

左文襄公全集

左文襄公奏稿卷十七

起同治五年丙寅正月訖四月

目錄

粵東軍務速蕝班師回閩摺

請將歸誠之黃朋厚免罪并賞給守備銜片

軍務完竣提臣應令各赴新任摺

請仍檄高連陞帶所部赴任片

各員請假回籍省親省墓片

江西助剿各軍分起回江粵軍撤畱應由廣東督撫酌度片

派員分駐閩境查辦土匪片

請卹因傷病故之鎮將并撤銷誤報陣亡將弁卹典片

恭報回省日期及沿途察看情形摺

撫臣徐宗幹請暫緩北上片

陳明譚體元伏誅緣由片

閩省餉需甚絀仍請接撥關稅銀兩摺

粵逆蕩平浙江協濟閩餉請停委解片

齋匪突陷崇安建陽兩城旋即收復見在追剿情形摺

水師續獲洋盜分別正法省釋片

水師提督患病懇 賞假在任醫治摺

請開復已革水師副將原官畱閩補用摺

請將救援主將不力之知府革職審辦摺

軍功武職復中武科應否將保案註冊抑或註銷摺
拏獲洋盜就地訊辦摺

官軍越境追剿齎匪殄滅淨盡并提臣前赴署任摺

續辦上下府各屬土匪情形摺

提臣病難速痊懇開缺 簡放并咨署提篆摺

師船遇風沈失軍火懇歸軍需案內報銷并 卹溺沒之外

委片

副將馬復震好學知書懇請改用文職片

請 敕銷犯弁沈滄海各保案片

克復紹興等城出力各員懇 恩仍照原請給獎摺

粵東軍務速蕝班師回閩摺

同治五年正月二十日

奏爲粵東軍務速蕝

微臣

班師回閩恭摺馳報仰祈

聖鑒事竊自上年十二月二十二夜收復嘉應州城二十三、四等日追剿竄賊擒斬各逆全數蕩平當經臣會同廣東督撫臣暨江西撫臣福建撫臣由驛馳報續據布政使銜福建延建邵道康國器稟二十三日追賊至豐順縣北白水寨一帶擒斬無算生擒逆渠洪秀全女壻僞金王鍾英僞幼陪王譚標僞懷王周春之姪周社福僞朝將黃松僞佐將何昌勝黃蘇寶解營經臣親訊明確軍前正法浙江提督鮑超續於降人中盤獲首逆汪海洋養子汪長林僞王宗汪起賢福建藩司王德榜續於降人中盤獲汪逆海洋

之妻張氏訊明汪逆無子除養子汪長林已正法外上年在連城楊家坊擄得農家五歲小兒養爲己子取名小貴當將張氏正法小貴交汀州紳士訪其父母領歸又獲僞列王李海清天將粟時之神將劉文昌朝將尹炳朝龍天義劉大福安天義譚有年魯天義謝引富喜天義陳大有合天義蔣明富保天福楊世求及各賊目張開元馬東海唐有元宋興貴魏亞底周助坤葛金勝曹正保等三百餘名粵軍副將鄭紹忠搜獲僞贊王賴阿養朝將劉必勝及悍賊一百九十六名粵軍副將鄧在倫總兵銜副將李元順等亦搜獲王有才江德勝王亞凱等十數名均立予斬決此外兇惡素著面貌猙獍者訊明從嚴懲辦其老弱及被脅日淺者委弁遞

送各原籍安插婦女幼孩不能行走者雇海船解送閩浙各省由各原籍紳商畱養轉覓其親屬領歸其壯丁五千餘名多江西安徽湖北各省民人暫派各營安插給以口食帶出粵境陸續資遣以廣

皇仁據廣東署豐順縣知縣同知銜候補知縣錢誦清正月初六日稟報旬日以來帶團丁窮搜巖穴百數十里閒蹤迹殆徧實無一賊藏匿其惠潮所屬各縣則本無一賊闖入也十五年逋誅劇寇自入網羅四五萬被脅殘民重登衽席此固非人力所及亦非微臣始願所及也布政使銜福建延建邵道康國器可否

賞給該員三代二品封典總兵銜補用副將福建陸路提標遊擊

李元順可否俟補副將後以總兵升用副將鄧在倫可否

賞加總兵銜同知銜署豐順縣知縣錢誦清可否以同知仍畱廣東補用出自

天恩臣頻年效力戎行未遑安處自浙江嚴州軍營患瘧愈後卽患飡泄至今數日卽發近來左脅下多生小疣左手左足麻木酸楚艱於乘騎昨自平和趨程入粵嶺路墜馬左腕疼痛益劇自念犬馬之齒甫五十有五不應衰憊至此惟不及早調治恐漸成偏枯之證擬於本月二十四日班師回閩由水路至潮州取道詔安以就坦易到閩後急爲調理如能速痊不敢乞假瀆陳也所有軍務辦竣回閩日期謹據實馳陳伏乞

皇上聖鑒訓示施行謹 奏

軍機大臣奉

旨另有旨欽此

請將歸誠之黃朋厚免罪并

賞給守備銜片

同治五年正月二十日

再僞奉王黃十四卽黃朋厚於上年十二月初閒密遣人赴劉典軍前乞撫劉典許之仍飭密覘汪逆動靜隨時稟知十二日之戰黃朋厚告都司蕭雅泗預爲之備汪逆伏誅後黃朋厚密陳羣賊洶洶之狀轉語夥黨勿抗官軍自取誅戮賊竄時黃朋厚揮其眾棄械伏地隻身潛匿山穴越兩日款營就撫其歸誠在先解散賊黨亦與有力可否免罪并

賞給守備銜之處出自

天恩謹附片具陳伏乞

聖鑒訓示施行謹 奏

軍機大臣奉

旨另有旨欽此

軍務完竣提臣應令各赴新任摺

同治五年正月二十日

奏爲軍務完竣提臣應令各赴新任以重職守恭摺仰祈

聖鑒事竊自嘉應收復髮逆蕩平閩粵江西三省一律解嚴臣已面商廣東陸路提督高連陞署浙江提督黃少春請各率所部卽赴新任廣東惠潮嘉一帶俗敝民頑久爲奸宄涵濡卵育之所此次從逆匪徒大受懲創諒已震懾

天威不敢狡焉思逞然大兵速撤或啟戎心高連陞所部應令統帶赴任以資鎮壓該軍正月以前月餉由臣清給二月以後應由廣東督撫臣按月照發以資飽騰浙江提督久未履任責任綦重曠誤堪虞黃少春旣蒙

特旨簡署是缺軍務既竣自應帶所部前赴新任以重職守除分咨高連陞黃少春各帶所部赴任外理合恭摺具報伏乞

皇上聖鑒訓示施行謹 奏

軍機大臣奉

旨高連陞黃少春均著各帶所部卽赴新任欽此

請仍檄高連陞帶所部赴任片

同治五年正月二十日

再正拜摺閒適准署兩廣督

臣

瑞麟

正月初十日來咨以東路肅

清催高連陞赴廣東陸路提督本任令其將部曲交各將領接管

聽臣檄飭凱旋

臣

維高連陞一軍馬步僅四千五百人上年

臣

檄

署衢州鎮劉清亮一軍三千餘人延建邵道康國器所部五千六

百人歸其節制調遣入粵會剿合共一萬三千餘人截至本年正

月底止所有薪糧均歸閩浙糧臺給領廣東僅於餉道中梗時曾

解過該軍餉銀四萬兩茲因軍務告竣廣東催高連陞赴任復咨

所部由

臣

檄飭回閩其意不過以此軍之餉始終推卸於閩耳如

果廣東兵力有餘募勇足恃無需借助客軍則高連陞一軍入粵

爲贅臣遵

旨檄調各軍入粵可以無庸卽廣東新募馮子才舊部之舉亦可不必如果此次軍務告竣之後廣東所收降卒各軍所散勇丁各屬逋誅土匪能保其不復滋生事端則臣之預畱高連陞一軍擬之誠爲過慮特還詢之廣東督撫臣亦必不能自釋也高連陞一時名將正宜爲時局珍惜俾盡所長今令其隻身赴任責以驟難整理之制兵治不可數計之匪寇勢必不能臣爲廣東慮之且不得不爲高連陞惜之見計高連陞所部除撤遣旋閩外僅畱五千餘人每月需餉不過三萬餘兩自本年二月起始歸廣東支應并非強以所難臣捫心自問所以爲廣東謀者不爲不至而廣東顧

難之欲臣一槩檄飭旋閩茲臣所不解也如謂高連陞軍餉仍應由閩支領則試爲廣東籌之應解協閩之餉約尙有三十餘萬兩此次資遣各省難民及嘉應州鎮平縣賑恤平糶米糧及臣勻撥鮑超一軍軍米價銀應由廣東解還歸款者亦約五萬餘兩卽以此款悉數移充高連陞軍餉以閩餉濟閩軍約足一年之需一年之後諸患漸平陸續裁撤此軍亦未爲晚伏思海疆之患起於廣東中原盜賊之患亦起於廣東當此軍務甫竣之時有籌兵籌餉之責者應如何懲前毖後以圖自強若仍以庸闇爲寬厚以諉卸爲能事明於小計暗於大謀恐未足紓朝廷南顧之憂也合無請